

СЭЛЭНГЭ АЙМГИЙН МАНДАЛ СУМ БОЛОН БОРОО ГОУЛД ХХК ХООРОНДЫН ХАМТЫН АЖИЛЛАГААНЫ ГЭРЭЭ

Хамтын ажиллагааны тухай энэхүү гэрээг нэг талаас Сэлэнгэ аймгийн Мандал сум, түүнийг төлөөлж тус сумын Засаг дарга Н.Лхагвадорж (цаашид “Засаг дарга” гэх), нөгөө талаас ашигт малтмалын тусгай зөвшөөрөл эзэмшигч Бороо Гоулд ХХК, түүнийг төлөөлж Ерөнхий Менежер Родни Чанин (цаашид “Тусгай зөвшөөрөл эзэмшигч” гэх) нар (цаашид хамтад нь “Талууд” гэх) дараах нөхцөлөөр харилцан тохиролцож 2018 оны 7 дугаар сарын 4-ны өдөр Мандал суманд байгуулав.

Нэг. Нийтлэг үндэслэл

Бороо Гоулд ХХК нь Сэлэнгэ аймгийн Мандал сумын нутагт орших Бороогийн үндсэн ордын тусгай зөвшөөрөл эзэмшигч мөн болно. Ашигт малтмалын тухай хуулийн 42 дугаар зүйлийн 42.1 дэх хэсэгт заасныг үндэслэн Талууд дараах зорилгоор энэхүү Гэрээг байгуулж байна. Үүнд:

1.1. Энэхүү гэрээтэй холбоотой харилцааг Монгол Улсын Үндсэн хууль, Ашигт малтмалын тухай хууль, Монгол Улсын Засаг захиргаа, нутаг дэвсгэрийн нэгж, түүний удирдлагын тухай хууль, Хөрөнгө оруулалтын тухай хууль болон холбогдох бусад хууль тогтоомж, олон улсын гэрээгээр зохицуулна;

1.2. Бороо Гоулд ХХК-ийн үйл ажиллагаанд дэмжлэг үзүүлэх, Орон нутгийн нийгэм, эдийн засгийн хөгжлийг дэмжин ажиллахад Талууд хоорондын хамтын ажиллагааг гүнзгийрүүлэх, тэдгээрийн эрх, үүрэг хариуцлагыг нарийвчлан тодорхойлоход оршино;

1.3. Энэхүү гэрээг хэрэгжүүлэхдээ талууд хууль дээдлэх, тэгш эрх, шударга ёс, харилцан бие биеэ хүндэтгэх, ил тод байх, сайн дурын үндсэн дээр гэрээний үүргээ биелүүлэх зарчмуудыг баримтлан ажиллана.

Хоёр. Засаг даргын эрх, үүрэг

Энэхүү гэрээний хүрээнд Засаг дарга дараах эрх, үүргийг хэрэгжүүлнэ:

2.1. Сумын нутаг дэвсгэрт хууль тогтоомжийн хүрээнд үйл ажиллагааг тогтвортой, хэвийн явуулах нөхцөлөөр тусгай зөвшөөрөл эзэмшигчийг хангах;

2.2. Гэрээний хүрээнд хэрэгжүүлсэн болон хэрэгжүүлэхээр төлөвлөж байгаа төсөл, арга хэмжээний талаар улирал тутам үнэн бодит мэдээллийг иргэдэд өгч, саналыг нь авах;

2.3. Тусгай зөвшөөрөл эзэмшигчийн зарласан ажлын байр болон бараа, ажил, үйлчилгээ худалдан авахтай холбогдсон мэдээллийг иргэд, ААНБ-д хүргэн ил тод, нээлттэй хэлбэрээр зохион байгуулах;

2.4. Тусгай зөвшөөрөл эзэмшигчийн Байгаль орчны менежментийн төлөвлөгөөний хэрэгжилт, нөхөн сэргээлтийн ажлыг батлагдсан үнэлгээ, төлөвлөгөөний дагуу хийгдэж буй эсэхэд хяналт тавих, хамтран ажиллах;

2.5. Тусгай зөвшөөрөл эзэмшигчийн гаргасан хүсэлт, шаардлагыг хууль тогтоомжид нийцүүлэн шийдвэрлэж, зохих хариуг өгөх;

2.6. Шаардлагатай тохиолдолд Тусгай зөвшөөрөл эзэмшигчид эмнэлэг, онцгой байдал, цагдаагийн үйлчилгээ үзүүлэх, түүнчлэн үйл ажиллагаагаа хэвийн бөгөөд тогтвортой явуулахад дэмжлэг үзүүлэх.

Гурав. Тусгай зөвшөөрөл эзэмшигчийн эрх, үүрэг

Энэхүү гэрээний хүрээнд тусгай зөвшөөрөл эзэмшигч дараах эрх, үүргийг хэрэгжүүлнэ:

3.1. Сумын иргэдийн хөдөлмөр эрхлэлтийг дэмжиж, тэднийг сургалтад хамруулах талаар ЗДТГ-тай хамтран ажиллаж, шаардлагатай ажлын байр болон тавигдах шаардлагыг ил тод, нээлттэй хэлбэрээр нийтэд зарлах;

3.2. Хэрэгжүүлэх төсөл, арга хэмжээний хүрээнд шаардлагатай ажлын байрны сургалтын хөтөлбөр боловсруулж, сумын иргэдийг хамруулах ажлыг зохион байгуулах;

3.3. Хэрэгжүүлж байгаа төсөл, арга хэмжээ болон үйл ажиллагааныхаа талаар сумын иргэдэд тогтмол буюу улирал бүр мэдээлэл өгч байх /сонин, сэтгүүл/;

3.4. Ажиллах хүч сонгохдоо, мөн бараа, ажил, үйлчилгээ худалдан авахдаа бусад адил төрлийн бараа үйлчилгээтэй өрсөлдөхүйц бараа үйлчилгээ бүхий, тус суманд бүртгэлтэй татвар төлөгч иргэн, хуулийн этгээдэд тэргүүн ээлжид давуу эрх олгохоор зорьж ажиллах;

3.5. Байгаль орчны асуудал эрхэлсэн төрийн захиргааны төв байгууллагын баталсан Байгаль орчны менежментийн төлөвлөгөөг (БОМТ) чанартай биелүүлж ажиллах. Үүнд:

- БОМТ, түүний хэрэгжилтийг орон нутгийн иргэдийн төлөөлөлд тайлагнах, хэлэлцүүлэг зохион байгуулах;
- Ойжуулалт, нөхөн сэргээлтийн ажлыг орон нутгийн иргэдийн төлөөлөлд танилцуулах;
- Байгаль орчны хяналт шинжилгээний хөтөлбөрт орон нутгийн иргэдийн төлөөллийг оролцуулах;

- Орон нутгийн ЕБС-дад Экологийн мэдлэг олгох сэдэвчилсэн албан бус сургалт хийх, ойжуулалт, нөхөн сэргээлтийн үйл ажиллагааг зохион байгуулах.

3.6. Гамшгийн үед сайн дурын үндсэн дээр суманд техник, тоног төхөөрөмж, ажиллах хүчний болон бусад материаллаг туслалцаа боломжтой хэмжээндээ үзүүлэх;

3.8. Үйл ажиллагаагаа хэвийн, тасралтгүй явуулахад сумын иргэн, хуулийн этгээдийн зүгээс хууль бусаар саад учруулсан тохиолдолд зохих журмын дагуу Засаг дарга, Иргэдийн Төлөөлөгчдийн Хуралд тавьж шийдвэрлүүлэх;

3.9. Байнгын, улирлын болон түр ажлын байранд Хөдөлмөр эрхлэлтийн бүртгэл мэдээллийн нэгдсэн санд бүртгэлтэй, компани тухайн ажлын шаардлага хангасан гэж үзсэн орон нутгийн иргэдээс сонгож ажиллуулахыг эрмэлзэнэ.

Дөрөв. Хамтран хэрэгжүүлэх ажлын чиглэлүүд

Талууд дараах чиглэлээр хамтран ажиллахаар тохиролцов.

4.1. Компани нь орон нутгийн хөгжлийг дэмжих зорилгоор 2018 онд 30,000,000.00 (гучин сая) төгрөгийн санхүүжилт олгоно. Төсөл хөтөлбөрийг сонгох, хяналт тавих ажлыг Хамтын ажиллагааны хороо (цаашид “Хороо” гэх) хэрэгжүүлнэ. Талууд дараах чиглэлийн төсөл, хөтөлбөрийг санхүүжүүлэхээр харилцан тохиролцов. Үүнд:

4.1.1. Дэд бүтцийн хөгжлийг дэмжих (зам засвар, замын тэмдэг тэмдэглэгээ, хурд сааруулагч, камержуулалт);

4.1.2. Нийгмийн суурь үйлчилгээний хөгжлийг дэмжих (эрүүл мэнд, боловсрол, мэргэжлийн сургалт);

4.1.3. Орон нутгийн жижиг дунд үйлдвэрлэлийн хөгжлийг дэмжих.

4.2. Компани нь орон нутгийн хүсэлтээр Бороогийн уурхайн нөхөн сэргээлтийн үйл ажиллагаатай танилцах аяллыг аюулгүй ажиллагаа хангах үүднээс нэг удаад 20-иос илүүгүй хүнд зохион байгуулах;

4.3. Компани нийгмийн хариуцлагын хүрээнд орон нутгийн нийгэм, эдийн засгийг дэмжих бусад төсөл хөтөлбөрийг сайн дурын үндсэн дээр хэрэгжүүлэхээр шийдсэн бол тухайн төсөл хөтөлбөрийг хэрэгжүүлэх эрхтэй. Үүнд дараах үйл ажиллагаа хамрагдаж болно.

4.3.1. Тэмдэглэлт баярыг хамтран зохион байгуулах, оролцох;

4.3.2. Ахмад настан, хөгжлийн бэрхшээлтэй, зорилтот бүлгийн иргэдийг дэмжиж ажиллах;

4.3.3. Соёл, спортын арга хэмжээг хамтран зохион байгуулах, дэмжих;

- 4.3.4. Урлаг, спортын өндөр амжилт гаргаж буй иргэдийг дэмжих;
- 4.3.5. Жижиг, дунд үйлдвэрлэлийг хөгжүүлэхэд хамтран ажиллах, дэмжих;
- 4.3.6. Мал аж ахуй, газар тариалангийн салбарыг дэмжих.
- 4.3.7. Сумын онцгой байдлын хэлтэстэй хамтран сургалт явуулж мэдээлэл солилцох.

Тав. Хамтын ажиллагааны хороо

5.1. Талууд гэрээний хүрээнд хэрэгжүүлэх төсөл, хөтөлбөрийг сонгох, түүний санхүүжилтийн зарцуулалтад хяналт тавих зорилгоор Хамтын ажиллагааны хороо байгуулахаар тохиролцов. Хорооны дүрмийг талууд боловсруулж, баталгаажуулсны үндсэн дээр Хороо үйл ажиллагаагаа эхлүүлнэ. Хорооны дүрэм, сонгон шалгаруулсан төсөл, хөтөлбөрийн жагсаалт нь энэхүү гэрээний хавсралт болно.

5.2. Хороо нь 9 хүний бүрэлдэхүүнтэй байх бөгөөд орон нутгийн төлөөлөл 5, Тусгай зөвшөөрөл эзэмшигчийн төлөөлөл 4 хүнтэйгээр байгуулагдана. Хорооны бүрэлдэхүүнд орох орон нутгийн төлөөллийг тухайн шатны Засаг дарга томилж, чөлөөлнө.

Зургаа. Гэрээний хэрэгжилт

6.1. Гэрээний ил тод байдлыг хангах зорилгоор сумын иргэдэд гэрээ байгуулсан талаар мэдээлэх бөгөөд гэрээ, түүнтэй холбогдсон баримт бичгийг талуудын цахим хуудсанд ажлын 3 хоногийн дотор байршуулна. Гэрээний хувийг ажлын 5 хоногийн дотор тус аймгийн Олборлох үйлдвэрлэлийн ил тод байдлын санаачилга (ОҮИТБС)-ын Дэд зөвлөлд хүргүүлнэ.

6.2. Талууд гэрээний биелэлтийн талаарх тайланг 2019 оны 2 дугаар сарын 01-ний дотор сумын Иргэдийн Төлөөлөгчдийн Хуралд хүргүүлнэ.

6.3. Талууд гэрээний тухайн жилийн биелэлтийн тайланг дараа оны 2 дугаар сарын 15-ны өдрийн дотор дээд шатны Засаг дарга болон Геологи, уул уурхайн асуудал хариуцсан төрийн захиргааны байгууллагад хүргүүлнэ.

Долоо. Гэрээний хариуцлага

7.1. Талууд гэрээгээр хүлээсэн үүргээ биелүүлээгүй тохиолдолд холбогдох хууль тогтоомжийн дагуу хариуцлага хүлээлгэнэ. Энэхүү гэрээ нь талууд хууль тогтоомжоор хүлээсэн бусад үүргээс татгалзах үндэслэл болохгүй.

7.2. Тусгай зөвшөөрөл эзэмшигч гэрээ байгуулсан талаарх мэдээллийг Геологи, уул уурхайн асуудал хариуцсан төрийн захиргааны байгууллагад тогтоосон хугацаанд хүргүүлнэ.

Найм. Маргаан шийдвэрлэх

8.1. Талууд гэрээний хэрэгжилттэй холбогдсон маргаан, зөрчлийг эв зүйгээр шийдвэрлэхийг эрмэлзэх бөгөөд тохиролцоонд хүрч чадаагүй тохиолдолд гомдлоо шүүхэд гаргаж болно.

Ес. Гэрээ хүчин төгөлдөр болох

9.1. Энэхүү гэрээ нь 2018 оны 12 сарын 31-ны өдөр хүртэл хүчин төгөлдөр байна.

9.2. Талууд гэнэтийн болон давагдашгүй хүчин зүйлийн улмаас гэрээг хугацаанаас өмнө дуусгавар болгож болно. Гэнэтийн болон давагдашгүй хүчин зүйл гэдэгт гал түймэр, газар хөдлөлт, салхи шуурга, аянга цахилгаан, үер усны гамшиг зэрэг байгалийн гамшиг, нийтийг хамарсан үймээн самуун, эмх замбараагүй байдал, ажил хаялт, эрчим хүчний тасалдал, эсэргүүцлийн хөдөлгөөн, гоц халдварт өвчин, дайн, террорист халдлага, төрийн эрх бүхий байгууллагын шийдвэр, хорио, цээр зэрэг талуудын хүсэл зоригоос үл хамаарах шалтгаануудыг ойлгоно.

9.3. Талууд харилцан тохиролцсоны үндсэн дээр гэрээнд нэмэлт, өөрчлөлт оруулж сунгаж болно. Гэрээнд оруулсан нэмэлт, өөрчлөлт нь гэрээний нэгэн адил хүчинтэй байх бөгөөд түүний салшгүй хэсэг болно.

9.4. Гэрээг англи, монгол хэлээр тус бүр 2 хувь үйлдэнэ. Хоёр хувилбарын хооронд зөрөө гарвал Монгол эхийг баримтлахаар Талууд тохиролцов.

ГЭРЭЭ БАЙГУУЛСАН:

СЭЛЭНГЭ АЙМГИЙН МАНДАЛ
СУМЫГ ТӨЛӨӨЛЖ:

МАНДАЛ СУМЫН ЗАСАГ ДАРГА
НАЦАГ ДОРЖИЙН ЛХАГВАДОРЖ



БОРОО ГОУЛД ХХК-Г ТӨЛӨӨЛЖ:

БОРОО ГОУЛД ХХК-ИЙН ЕРӨНХИЙ
МЕНЕЖЕР
РОДНИ ЧАНИН

